



FOTO: MILENA EHRENSPERGER

Katrina Dalbert e Adelina Mittner-Beer en il post da cussegliaziun a Cuira.

FAMIGLIAS DAL DI

Intervista cun Katrina Dalbert, manadra dal post da consultaziun da l'Uniun per la tgira d'uffants complementara a la famiglia, ed Adelina Mittner-Beer, responsabla per l'administraziun da l'organisaziun da las «mamas dal di».

Giasetta Coop: Tge è ina famiglia dal di?

Katrina Dalbert e Adelina Mittner: Ina famiglia dal di tgira uffants d'autras famiglias tar ella a chasa. La tgira d'uffants en questas famiglias po vegnir adat-

tada als vairs basegns, sco maisa da gentar, la tgira da mez di u er la tgira dal di durant l'entir'emna.

Pertge dovri ina famiglia dal di?

Perquai che la famiglia è daventada vaira pitschna: La parantella nun è avant maun, ils geniturs èn magari separads e/u a la lavur. L'uffant drova questa famiglia complementara per sia evoluziun emoziunala e sociala – per na restar isolà. Il contact en in ravugl pli grond è per el impurtantissem.

Quant grond è il basegn per famiglias dal di e co è reglada la finanziaziun?

Il basegn è fitg grond – nus na vegnin strusch da chattar avunda plazzas per ils uffants. Nus survegnin raps dals geniturs, da sponsurs e da tscherts cumins, ma quai na basta. Nus duvrassen raps na be per l'organisaziun da l'intermediaziun e la scolaziun da las mammas dal di ch'è fitg impurtanta per che tut funcziunia bain, ma surtut per indemnisar las famiglias dal di, cunquai ch'ils geniturs

dals uffants na pon surpigliar tut ils custs. E la finala èn las famiglias dal di era d'util per ils cumins, per ils servetschs socials e per l'economia surtut quella turistica. Na dapertut datti canortas e gist per cumins pitschens è questa soluziun bler pli simpla e main custavla.

Tge porscha l'Uniun per la tgira d'uffants complementara a la famiglia?

L'Uniun sa cumpona da diversas gruppas regiunalas. Ellas intermedieschan ed accumpognan la tgira d'uffants complementara. Ils posts regiunals infurmeschan davart la purschida e las activitads da l'uniun. Ella è averta a a tut las persunas interessadas. L'Uniun da tetg ha sco finamira da promover la tgira dals uffants en l'entir chantun. Ella è post da coordinaziun e cussagliaziun per projects e s'engascha per la politica da famiglia.

Tge èn vossas visiuns?

Nus vulessans reconstruir a moda effizienta e moderna l'agid vicendaivel en la societad. En Austria e Finlandia ch'èn bler pli enavant cun quest sistem datti la «mamma dal di» sco professiun. Ina da nossas finamiras è che quest servetsch saja renconuschì e sustegnì er politicamain.

Intervista: Anna Ratti